

Elkarbizitzaren ibilbidean

Jaioko dira berriak

MIKEL UGALDE

Gure Errenteriaren ibilbidean geroz eta nabarmenago sumatzen dugu herri bizia garelara. Herri honek badu bihotza, badu argia, badu lanerako gogoia, badu herri bezala aurrera egiteko indarra. Bere aniztasuna aberasgarri gertatzen ari zaigu. Harritzekoa ere bada zenbat eta zeinen alor desberdinetako ekitaldiak, eta zeinen arrakastatsuak, antolatzen diren urtean zehar. Gu geu ohitu samartuak gauden arren, kanpotik hurbiltzen zaizkigunek aho batez gorai patzen dute gure herri honen izaera berezia. Hau guztia nabarmena denez, ez dugu aipamen luzamenduetan ibili beharrik.

Hemen dioguna ez da gaurko edota oraingo kontua. Iraganen ere alor politiko, sozial eta kulturean biziki ahalegindu izan zen herria da gurea.

Aurrera begira

Iragan kontuak joan ziren eta egungoa bizi dugu geroari eta etorkizunari begira. Egia da gure herri honen bizitzan era askotako gertaerak bizi izan

ditugula eta, zenbaitetan, ez direla guztiak gozoak izan.

Kontua da ezagunak zaizkigun arrazoiengatik, behin baino gehiagotan herritarren arteko harremanak artesitu, bihurtu, mingostu izan zaizkigula elkarbizitza bera ere astintzeraino. Herri bizia gara bai, baina gure artekoa ez da guztia urre gorria izan.

Zorionez, iraganen eginiko akatsak zuzendu eta egoerak aldatzeko, normalizatzeko, elkargunek lantzeko, elkarrekin aurrera egiteko gogoia indartzen doakigula sumatzen dugu. Gertatuak gertatu, aurrera begira jartzea ezinbestekoa dugu. Eta horregatik, hain zuzen, aintzat hartzekoa da herritar talde batek elkarbizitza gogoan, eginiko ahalegina.

Elkarrizketarako ekimena

Apirilaren amaieran zabaldu eta ezagutarazita agiriak biltzen du egokien ekimen honen non-



ARGAZKIAK: IKERNE ZARATE (OARSO BIDASOKO HITZA).

“Ekimenean esku hartu duten kideak”

dik-norakoa “Taldera hurbildu ginenean, hainbat arrazoi, behar eta nahiek bultzatuta hurbildu ginen. Guztiok argi genuen abagune horrek aukera emango zigula ordura artekoarekin zerikusirik ez zuen zerbait berriaren oinarriak jartzeko”. Pentsaeraz eta izaeraz desberdin izanik, historia pertsonalak, bizi izandako esperientziak, kezkek eta errezeloak tartekatzen ziren 2012an taldea martxan jarri zeneko urte hartan. Partaide bakoitzak bere ideiak, asmoak, burutazioak, berriazko motxila zituen, iturri desberdinetatik bildutako urak bateratzea ez zen erraza. Helburuak finkatzeari baino bitartekoak prestatzeari eta zaintzeari arreta handiagoa eskaini zitzaion. Elkarrekin eraiki beharreko kontua izanik, elkarriketari, elkarri entzuteari, elkar ezagutzeari lehenetsi zitzaion.

Zailtasunak

Ibilera horretan zailtasunak ez dira falta izan, horrela adierazten digu agiriak dakarren ondoko pasartean. “Denbora pasa ahala konturatu gara hasitako ibilbide horren amaieran ez dugula aurkitu guk hasiera batean buruan genuena, eta horrek bertigoa, frustrazioa eta tentsioa eragin dizkigu... Azken batean, sinetsi behar genuen elkarrekin eraikiko genuela helburu komuna eta bizikidetzako esperientzia erreala irudikatu. Azken emaitza ezin zenez kontrolatu, eskuzabaltasun eta konfiantza osoz jokatu behar izan dugu”, aitortzen dute aipatu agirian.

Honen ondorioz, elkarriketa sakona, leiala, positiboa izan dela azpimarratuko dute partaideek. Ez da ez nolanhikoa izan: “gure bizipenik sakonenak partekatu ditugu, errespetuz entzuna sentitu gara, sentitu dugu sinesten zigutela, aintzatespena sumatu dugu, eta gai izan gara enpatiaren bidea egin eta bestearen mina gurea egiteko. Ez gara entzule soilik izan, orain arte besterena edo urrunekoa sentitzen genuen sufrimenduan bidaide izan gara”. Merezi izan duela baitetsiko dute jarraian.

Hiru urte luzetan eginiko ahaleginean herri bizitzan gertatutako gorabeherak prozesuan eragina izan duten arren, eutsi diote taldearen ibilerari.

Ondorioak

Nahiz eta elkarriketarako enpatia eta konfiantza ahalbidetu den, adostasun politikoetara iristeko arazoak salba ezinak izan dira. “Konfiantzazko



eta errespetuzko ingurunean gai izan gara pertsona eta bere iritzia bereizteko eta horri esker gure arteko distantzia ideologikoa eta politikoa neurria hartzeko gai izan gara, ulertu dugu bakoitzak nondik hitz egiten duen, zer dagoen hitzen eta jarrera desberdinen azpian eta, azken batean, agerian geratu da zer partekatzen dugun eta zer ez”.

Ekimen honetan parte hartu dutenen iritziz, eginiko ahaleginak merezi izan du. “Prozesu honek aldatu egin gaitu; lehen ziur genuen horretan zalantzak piztu dizkigu, elkar ezagutzeko entzun diogu elkarri. Hartara, ezjakintasuna gaintetik kendu dugu, bizitu eta sufritu dugunaren larritasunaz jabetu gara eta horrek pertsona hobeak bilakatu gaitu, objektiboagoak gara orain”.

Jaioko dira berriak

Ekimen honen berri prentsa eta komunikabideen aurrean ematerakoan, taldearen etorkizunaz galdetu zuen kazetarietako batek. Taldeak ekimena bere horretan amaitzen zuela adierazi zitzaion, beti ere ekitaldi berrietarako esperientzia interesgarria izan zitekeela azpimarratuz. Oraindik zer egin luzea gelditzen zaigu elkarbizitza normalizatu finkatuz aurrera egiteko. Jaioko dira bai esperientzia eta ahalegin berriak, horixe da gure esperantza.